



Arno Camenisch prelegia.

FOTO G. CAPAUL

## Sentupada cun Arno Camenisch

El Center sursilvan d'agricultura a Salaplauna/Mustér

■ (anr/gc) **Ins ha udiu e legiu il davos onn bia dil giuven scribent romontsch Arno Camenisch. Cun siu «Sez Ner» ha el daveras fatg furore ella scena litterara svizra. Persuenter ha ei dau bia laud e plirs premis.** Il cudisch, denton translataus en divers lungatgs, ei vegnius vendius en mellis e mellis exemplars – en cefras d'in bestseller. Avon cuort temps ei siu secund opus cumpariu: «Hinter dem Bahnhof». Vegn vitier che *Arno Camenisch* ha gest acquistau agl Institut svizzer da litteratura a Bienna/Biel il diplom ed ei uss igl emprem scriptur romontsch diplomau.

Cun biasas arbagias ei il scribent Arno Camenisch, carschius si a Tavanasa, turnaus bugen en Surselva ed ha giavischau da saver seppresentar e preleger el Center sursilvan d'agricultura Salaplauna a Mustér. Quei liug hagi ina relaziun

cun sia ovra «Sez Ner» davart veta ed acziun alpestra. Il president dil Center sursilvan d'agricultura a Mustér, *Iso Mazzetta*, ha fatg beinvegni ad in grond publicum interessau. El ha dau in sguard sin quei edifeci che seigi era adattaus per inscuters culturals da gener divers. Bugen ha el perquei surpriu l'organaziun dalla sera litterara. Quei ei denton sefateg da cuminonza cun la Chasa editura rumantscha, che vegn menada dad *Anita Decurtins-Capaul*. Ella ha presentau il scribent Arno Camenisch. En quella casa editura ei «Sez Ner» cumpariu il matg vargau sco cudisch auditiv. Ins sa pia sechar leger avon il cudisch tras igl autur sez.

Duront in'ura ha Arno Camenisch prelegiu – pil pli ord «Sez Ner» – ton per romontsch sco per tudestg, ed alla fin aunc zacons capetels dall'ovra novissima

«Hinter dem Bahnhof». El ha fatg bein e simpaticamein sia caussa. Al publicum ha ei mintgacass plaschiu che ha quittau cuntents e savens era cun in surrir las «aventuras e reminiscenzas» da si d'alp e specialme in la descripziun e caracterisaziun da vischinas e vischins da Tavanasa. Ils cuorts «capetels», da stil singular e d'in lungatg nunfrisau e tut agradora, mishedau, original, mintgaton era bravamein aviert ed abrupt arrivau bein e tgunsch tier ils attents e spanegiai auditors ed auditoras. Biars dad els han lu era cumprau suenter ses cudischs e schau signar els. Suenter la prelecziun ha ins gudiu igl apero, oravontut cun caschiel gest vegnius giu da pliras alps dil contuorn – denteren era dall'Alp Sezner che ha dau all'ovra il num e ch'ei daventada per Arno Camenisch propi ina historia da success.

## «Kunstschalter» per la davosa

Il gallarist e la Retica ein buca vegni perina pervia dil diever dalla staziun da Sumvitg

■ (ac) **La sonda passada ha igl anteriur fittader dallas localitads dalla staziun da Sumvitg, Hannes Schüle, envidau alla finissascha dall'exposiziun «Sculpturas da lenn». Cun l'invitaziun a quella finissascha ha el tematisau la fin dil «Kunstschalter» ellas localitads dalla staziun.** Cun ina occurrenza artistica da tuns, getgas e dessegs ha il gallarist *Hannes Schüle* envidau la sonda passada ell'ustria dalla staziun a Sumvitg. El ha stipulau quella occurrenza sco finissascha dall'exposiziun «Sculpturas da lenn» ed en in grau era per siu «Kunst-

schalter» staus domiciliu els stabiliments dalla staziun da Sumvitg. Duront ovg onns ha il gallarist *Hannes Schüle* organisau differentas exposiziuns en quels stabiliments. Stabiliments ch'el ha giu affittau dalla Viafier retica. Pressapau avon in onn ha la Viafier retica denton visau il contract d'affittaziun. Sco ei para ein il gallarist e la viafier buca propi s'accordai pervia dil diever dil spazi artistic el contuorn dalla staziun. La viafier ha fatg valer ch'igl access al tren seigi staus impediud all'atgna clientella. Ton ei silmeins d'endriescher dils documents

publicai silla pagina d'internet dil gallarist. Bein ha il affittader fatg valer ses dretgs viers l'Autoritad d'intermediaziun per relaziuns da locaziun dil district Surselva. L'autoritad ha denton taxau la visada dil contract sco legala. Ussa renfatscha il gallarist alla viafier culturala retica munconza da senn per cultura. Il plidader dalla Viafier retica, *Peider Härtli*, ha buca vuliu commentar la fin dil «Kunstschalter» a Sumvitg. Per la Viafier retica seigi la visada nuot auter ch'in act usitau denter locatur e locatari. Finissascha cun getga, tun e maletg.



Igl art ha bandunau la staziun da Sumvitg. La Viafier retica ha visau il contract cul gallarist avon in onn.

FOTO A. CADONAU

## In triep giubilaris

Chor viril romontsch Lucerna

■ **Ils 17 da settember ha nies chor viril giu sia radunonza generala annuala. D'ina radunonza generala spitgass ins in triep commembers e s'imagnass ina sala pleina. Quei ei denton vargau, oz quenta il chor aunc 20 commembers silla gliesta, da quels 17 actives.** Ins seregorda dils 42 commembers actives da tschels onns e sesprova da stender il pass suenter la comba, sco dirigent *Glieci Blumenthal* ha per moda da dir, cura ch'el adattescha las canzuns al diember ed alla capaciad dils cantadurs actives.

### Meriteivels commembers

President *Adalgott Berther* fa beinvegni als 16 presents alla 49avla radunonza generala. Cun ses giavischs a *Raimund Demarmels* fetg malsaus e cun in memento a *Wolfgang Solèr* che ha bandunau nus ils 21 da fenadur 2010 per adina sa nies president far paleis ch'el dirigent *Glieci Blumenthal* diregi il chor dapi 20 onns e ch'el sez presidiess el il medem temps, dus giubilaris da capo. Cun satisfacziun prendein nus enconuschientscha che la suprastanza ha negins posts vacants. Pia en quei grau resta la direcziun sco tochen uss. Siu rapport annual cuntegn ina roscha occurrenzas, perdetga ch'el chor viva e sesprova da tgirar e presentar la canzun romontscha a Lucerna e contuorn. Extradas ein igl onn vargau stadas neginas. Mo mauncan displascheivlamein entradas. La sanadad sgurdinada d'enqualin e la vegliadetgna ein la raschun ch'el chor ei buca pli quel d'an-

truras. Tonpli eisi da confirmar che mintga cantadur presta siu pusseivel e possibilitescha cheutras in ni l'auter eveniment cantic. Visetas a casas da vegls, la sera da Nadal, survetschs divins, la fiasta da famiglia tiels da Zug, la fiasta da curtgin ein entginas rosinas ord la tuorta digl onn vargau.

In eveniment tut special e buca meins sentimental ei la sepultura da nies president d'honor e commember fundatur *Wolfgang Solèr* stada, nua che la canzun romontscha ha impressiunau e delectau la gronda raspada ella baselgia *Maihof* a Lucerna. President *Berther* regorda commuentaus las multiplas occurrenzas, nua che *Wolfgang* ha cun siu dun migeivel e conciliot tgamunau nies chor duront 20 onns. Nus tuts salvein el en pia memoria.

20 onns ei pil chor sco ins vesa buca mo cefra vita, mobein liung engaschament da commembers ch'ei stai fideivels en ina ni l'autra incarica. Treis giubilaris han festivau uonn lur 80avel natalezi. Quels fideivels ein semess ensem ed han pagau la tscheina dalla radunonza generala. In niev pensiunau ei buca staus maufers ed ha surpriu igl aperitiv. Gia quei muossa l'atmosfera agrebla en nies chor: commembers attempai, camerats spendabels ed in chor romontsch che vul malgrad tut cuntinuar el futur schi ditg... na, buca sco cuolms e vals statan, mobein tochen che nus essan buca pli habels da presentar lungatg e cant romontsch ella Bassa. Buna cuntinuaziun!

Dumeni Capeder, Lucerna



Ils victurs dalla concurrenza da pesca en Val Lumnezia: Marco Derungs (secund), Rico Rossi (victur) e Heinz Egli (tierz) (da sen.).

MAO

## Rico Rossi – senza concurrenza

Concurrenza da pescar dalla Uniun da pescadurs Lumnezia

■ (Iq) **Per la 33avla gada ha la Uniun da pescadurs Lumnezia organisau uonn la concurrenza tradiziunala da pesca. Da stupenta aura han ils 14 participonts pigliau 27 pèschs cun ina peisa totala da 6,24 kilos.** Il maximum da sis pèschs han schinzun dus participonts contonschiu. Il niev e vegl retg da pesca en Val Lumnezia ei ina gada dapli *Rico Rossi* (Tusaun) staus. El ha numnadamein saviu festivar uonn siu 16avel tetel da campiun. Buca meins che 25 gadas ei el staus sil podest dapi la fundaziun dalla uniun avon 33 onns. Cun sia reha preda da 2026 grams ei el sedistanziaus claramein da

siu proxim concurrent ed ha ultra da quei era acquistau la trofea pil pli liung pèsch cun ina mesira da 37 centimeters. Sin rang dus seclasescha *Marco Derungs* (Uors) cun ses 6 pèschs cun ina peisa totala da 1459 grams avon *Heinz Egli* (Tusaun) cun ina pescada totala da 803 grams.

### Gliesta da rangaziun

1. Rico Rossi, Tusaun 46,52 puncts; 2. Marco Derungs, Uors 35,18 puncts; 3. Heinz Egli, Tusaun 21,06 puncts; 4. Corsin Derungs, Uors 15,70 puncts; 5. Seppli Derungs, Uors 14,40 puncts; 6. Gabriel Cantieni, Tersnaus 9,02 puncts; 7. Gieri Lombris, Vella 5,88 puncts; 8. Marius Cantieni, Tusaun 4,04 puncts.

### TRUN

## Il Chor viril da Trun exista buca pli

(ac) Il Chor viril da Trun ha decidiu il vendergis passau da sliagar l'uniun da cant. Cun quella decisiun va ina liunga tradiziun da cant a fin ella vischnaunca da Trun. Tenor in rapport dad RTR han ils 17 commembers presents alla radunonza priu la decisiun finala en vesta alla munconza dad interess per il cant viril en vischnaunca. Per

cuntinuar cun quei cant fussen biebein 30 commembers stai necessaris. Aschia ei la historia dad in chor fundaus avon bunamein 140 onns da 17 amatur da cant terminada. Aunc avon paucs decennis valeva il Chor viril da Trun sco ina dallas meglieras formaziuns virilas en Surselva sche buc egl entir cantun Grischun.